

Develacion statua di Betico posponi algun siman

ORANJESTAD (AAN) Fundacion Betico Croes ta anuncia cu debi na cierto obstaculonan cu a surgi, entre otro e problemanan cu a tuma lugar na Venezuela, e fecha di develacion di e statua, programa pa dia 18 di Maart, mester a ser posponi algun

siman. E sucesonan a demora e trahamento ariba e statua y su envio pa Aruba. Ademas, mester a demora tambe e invitacionnan pa personajenan di otro paisnan cu ta ser invita pa haci acto di presencia durante e ceremonian di develacion.

entre nan e Presidente di Venezuela y otro alto personalidadnan di mundo politico Venezolano, kendenan actualmente no por ausenta nan mes di nan pais.

E statua mes ta cla caba y ta awor den proceso di endurecimiento na Merida, na unda el a ser traha pa un di e escultornan mas famoso di Venezuela. Ta trata di un persona cu ta ser solicitada pa traha statuanan na Venezuela cu hopi frecuencia.

Ta ser calcula cu e statua lo ta na Aruba den e proximo dos

simannan, y cu posterior na esey, e fecha nobo di su develacion lo ser anuncia pa Fundacion Betico Croes.

Mientras tanto comisionnan nombra for di e propio Directiva a viaha caba den mas di 3 ocasion pa Merida, pa supervisa e laborman ariba e statua, y na nan regreso ultimo biaha nan a mustra nan mes hopi satisfecho cu ya e statua ta cla y cu el a ser bon traha.

Awe ta cuminza basha e base ariba cual e statua ta bin, na Plaza Betico Croes, pa laga esaki cla den e proximo 10

dianan. Una vez confirmacion ser recibi di e dia ariba cual e statua lo ser embarca pa Aruba, Directiva di Fundacion Betico Croes lo fiha e fecha pa su develacion.

Mientras tanto, Fundacion ta participa cu monedanan conmemorativo ta disponible cerca cualquier miembro di e Directiva di Fundacion Betico Croes. Tin moneda di oro, di plata y di brons, y Fundacion ta participa cu una vez nan caba,

no ta bay imprimi mas, dunando nan asina un valor grandi di inversion. No tarda pa cumpra

di bo pasobra pronto no ta bay tin mas.

Tambe Fundacion Betico Croes ta biniendo cla cu un rifa di dos auto, cu pronto lo ser ofreci na publico. E rifa ta pa recauda e fondonan necesario pa continua cu e laborman di Fundacion Betico Croes, y cu no ta mara na e statua so. Tin hopi proyecto mas den preparacion y pa logra nan tin mester di recauda e fondonan necesario. Asina Fundacion Betico Croes ta continua cu su laborman, cu den ultimo simannan a intensifica hopi den espera di e statua cu pronto lo ta na Aruba.